



**Repons Lo Bidze 2026**  
**GOUVERNMAN SESEL**

**Delivre par:**

**MINIS PIERRE LAPORTE**

**MINIS POUR FINANS, PLANIFIKASYON EKONOMI, KOMERS  
EK LENVESTIMAN**

**Dan Lasanble Nasyonal Sesel**

**Ile Du Port, Victoria, Mahe, Seychelles**

**Vandredi le 20 Fevriye 2026**

**Madanm Spiker,**

**Dirizan Lopoziyon,**

**Dirizan Zafer Gouvernman,**

**Tou Manm Onorab e**

**Tou dimoun a lekout,**

**Bonzour.**

Madanm Spiker, mon pou komans mon ladres ozordi par remersi dabor ou menm pou ou leadership efektiv pandan sa 3 zour deliberasyon. Mon oule osi remersi bann manm lasanble nasyonal le de parti pou zot bann entervansyon k'in monn resevwar avek apresiasyon e respe, sirtou bann manm parti US k'in montre zot sipor total pou bidze 2026, e kin montre en o nivo apresiasyon e konpreansyon sa nouvo vizyon pou en Sesel pli ekitab, ki Prezidan Dr. Patrick Herminie in enspir nou avek, e ki sa bidze pe siporte.

Madanm Spiker, monn note ankor avek gratitid ki serten manm dan parti lopoziyon in endike ki zot pou donn sipor pou sa bidze. Mon remersye zot. Me sepandan, mon konstate ki serten sa bann manm LDS swa pann byen ekoute ou pann byen lir mon bidze, akoz mon santi serten konfizyon e menm lafreyer parmi serten zot.

Lafreyer Madanm Spiker, mon mazine akoz zot t'in fit zot krok parey gran moun i dir, pou vwar en bidze dan defisit e enn ki ti pou anmenn nou pei dan plis andetman ler nou ti poun rann travayer Seselwa zot trezyenm mwan saler, zot long servis alawenns, zot gratite ; lafreyer akoz noun retourn bann skim ki permet dimon, enkli bann zenn ki pa dan lanplwa pou ganny en aktivite ekonomik; lafreyer akoz noun anmenn en bidze ek en nivo lenvestisman piblik ki pou donn bokou plis fanmiy

Seselwa en lakaz e en amelyorasyon zeneral dan kalite lefrastriktir; e lafreyer aköz zot santi ki bann reform dan servis piblik e lanvironnman biznes, pou al akseler lenvestisman. Tou sa in met sa bann dimoun lo mon kote gos dan ‘panick mode’.

Madanm Spiker mon reste konvenki ki Bidze ki monn anmennen devan sa Lasanble pour 2026 e bann polisi ki pou siport sa bidze i solid e pou anmenn en meyer lavi pou tou fanmiy Seselwa e kominote biznes. Menm si lopozisyon pa oule aksepte, sa i en bidze pou tou, pa zis pou serten!

Parey Onorab Lemiel in rapel nou, sa bidze i rekonnet rol travayer e rekonpans zot. Enn kin rann travayer zot drwa e benefis ki LDS tin aras zot. En bidze ki pou redwir inegalite. En bidze ki adres bann defi sosyo-ekonomik nou pei dan en fason global e non pa an izolasyon. En bidze innovativ ki entrodwir bann nosyon e mekanizm modern.

Lo sa Madanm Spiker, monn konstata ki bann manm lasanble dan lopozisyon in ganny difikilte pou konpran e adapte avek sa bann konsep modern kin noun entegre dan manifesto e dan sa bidze, tel ki ‘Triple Lock’ pou logmantasyon anyel dan peyman sekirite sosyal, ou ‘Living Wage’ ki pou ed bann fanmiy annan en meyer lavi e en lavi pli dignifye. Serten in akiz mwan pou pann koz lo ‘Triple Lock ou Living Wage’. Madanm Spiker wi mon pann koz lo la aköz mwan e mon bann koleg parti e gouvèrnman noun deza koz lo la plizyer fwa, ler Lasanble ti interview mwan, zot ti demann menm kestyon Triple lock ek tou minis ki ti pas devan zot! Prezidan Herminie in osi koz lo la.

Madanm Spiker, se en zouzou ki ler ou annwiye ou pran li en kou e ou zwe avek. ‘Triple Lock e Living Wage’ pa zouzou, zot en bann zouti serye ki nou pou servi pou amelyor lavi nou pep en non pa pou zwe avek. Alor bann manm LDS, pa trakase, zot pou tann koz lo sa de keksoz, me selman ler i nesaser.

Me vi ki nou lo sa de pwen mon a profite pou eksplik brefman pou benefis popilasyon ki pe ekoute e osi bann manm lasanble, sa de konsep. Dabor, mekanizm ‘Triple-Lock’ i en seri trwa opsyon ki nou gouvèrnman pou servi, enn dan sa trwa opsyon ki donn en pli o nivo logmantasyon, pou servi

pou ogmant nivo sekirite sosyal. Sa trwa opsyon i (i) nivo lenflasyon, (ii) nivo logmantasyon saler mwayenn pei, e (iii) 3.5 pousan ki en to ki Gouvernman in deside.

‘Living Wage’, Madanm Spiker, i en e nivo saler ‘nosyonel’ ki gouvernman pou etabli e ki a ganny konsidere adekwat pou en fanmiy zourir en nivo lavi rezonab. Nivo living wage I baze lo serten eleman ki en fanmiy i konsomen osi bann servis ki zot akse, e ki ganny determinen atraver en Household Budget Survey (lanket bidze en lakour). Enn fwa sa nivo poun ganny etabli, gouvernman ava konplemant saler ki sa fanmiy pe gannyen par lasistans welfare ki sa fanmiy pou kalifye pou gannyen enkli bann lasistans tel ki childcare, STC card etc. Parey mon ti dir dan mon ladres bidze Zedi pase, sa travay i an kour e wi bann manm Onorab LDS plis detay ava ganny donnen ler travay a konplete.

Madanm Spiker, avan mon al pli lwen pou koz ankor enpe plis detay lo sa bidze, ti annan serten kestyon par bann manm, lo komitman 100 zour. Mon pou zis donn en pti apersi lo la. Ziska Ozordi, 23 dan 45 sa bann komitman in totalman konplete, 20 i an progre savedir pratikman konplete e zis 2 ki an kour.

Madanm Spiker mon pa ti oule repet sa ki monn prezante dan mon bidze pou pa tro perdi letan person, me vi ki bann manm parti LDS pann war nanryen dan sa bidze mon santi mwan oblize pou rapel zot bann gran liny. Alors Madanm Spiker permet mwan pou elimin sa bann konfizyon e donnan zot de trwa legzanp :

1. En trezyenm mwan lapey ki aplikab pou tou Seselwa ki pe travay konpare avek en sistenm kot bokou Seselwa ti pe ganny zis en porsyon zot trezyenm mwan lapey.
2. STC pou azout douz prodwi adisyonnal lo son lalis komodite esansyel. Monn demann STC pou pibliy sa lalis me mon pou liste zot isi. Sa i:
  - a. Riscossa Pasta
  - b. Fan Juice
  - c. Seyte Black Tea
  - d. Nacional Corn Flakes/cereal
  - e. Yorsan UHT Milk
  - f. Keskinoglu Chicken Franks

- g. Monfruit Long Life Yogurt
  - h. Esko Biscuits
  - i. Orchid Toilet Paper
  - j. Confy Baby Diapers
  - k. Confy Adult Diapers
  - l. Confy Baby Wipes & Labour Dishwashing Paste.
3. Reform pou amelyor Klima Fer Biznes i kree loportinite e ed bann pti antreprenner ki pas mwens letan pe fer fas avek birokrasi e kapab pas plis letan devlop son biznes.
  4. Pri bis ki'n desann par SR 2 konmansman Fevriye 2026, e pou desann ankor an 2027 e 2028.
  5. Ogmantasyon benefis retret sekirite sosyal ki'n ogmante par SR 800 konmansman Zanvyè 2026 e ki pou ogmante sak lannen pou ariv SR10,000 rounpi par mwan o pli tard 2029
  6. Nou pou delivre plis ki 200 lakaz abordab e plis ki 120 apartman pou bann profesyonnel an 2026
  7. Nou pou delivre plis ki 150 kare later pour lannen 2026.
  8. En bidze ki kouver logmantasyon dan 'stipend' pour bann etidyan ki pe etidye aletranze depi le 1 Zanvyè 2026
  9. Re-entrodiksyon long servis alawenns depi Desannm 2025
  10. En sonm SR 27 milyon in ganny mete anba reminerasyon e saler pou revizyon sa bann kad saler
  11. Revizyon dan Gratwite pour bann Travayer ki lo en baz Servis Kontinyel
  12. Revizyon Gratwite Anyel e Alawenns Performans pour bann travayer ki annan Kontra avek Komisyon Sekter Piblik a parti Zanvyè 2026
  13. Gouvernman in entrodwir en sipor adisyonnèl SR 750 par mwan, pou lasistans "child care" apartir le premye Fevriye 2026.
  14. En 'National Living Wage' pou ganny entrodwir an 2026

Madanm Spiker, lalis i long, me mon swete ki lopoziyon i pran sa weekend pour lir ankor diskour bidze avan staz komite i konmanse Lendi. Parey zot konnen, pandan staz komite bann manm pou

osi kapab demann plizyer kestyon bann Minister, Departman e Lazans lo alokasyon ki'n ganny bidzete pou sak antite.

Madanm Spiker, Onorab George e en nonm son bann koleg dan parti LDS in a plizyer repriz fer referans avek lefe ki monn promet ki plis detay lo bann polisi ki monn anonse ava ganny donner byento. Madanm Spiker, wi sa i vre, me les mwan dir Onorab George ek son tim ki monn oblize fer sa aköz pandan sa premye trwa mwa ki noun vin o pouvwar, monn bezwen pas pli gran parti mon letan dan Konsey Minis (Cabinet) avek Prezidan, VP et mon bann koleg Minis pou repar sa bann dega enstitisyonnel ki gouvernman LDS in fer pandan sa senk an o pouvwar.

Noun bezwen pas en bann long erdtan dan Cabinet pou remet bann kad legal e enstitisyonnel pou rann nou travayer e bann fanmiy sa ki LDS tin aras zot, tel ki 13enm mwan saler, long service alawenns, gratuite, tou sa bann skim pou remet bann zenn e lezot Seselwa dan Lanplwa, remet bann striktir ministeryel tel, Seychelles Tourism Board ki nou zouti prensipal pou fer marketing nou sekter touris, e pou remet nou Minister Kiltir an egzistans, ki nesaser, aköz anba son sistenm kot ti napa en minister Kiltir, LDS ti pe dousman detrir nou kiltir e nou leritaz, de keksoz ki tou Seselwa san leksepsyon i gard a ker. Osi parey APDAR ki sitan enportan dan nou zefor pou ed bann sitwayen k'in ganny afekte avek drog, ki gouvernman LDS ti konsider li pa en priorite.

Madanm Spiker lalis i long. Alors Onorab George ek ou bann koleg mon dir zot pa trakase, tou sa ki noun koz lo la pou ganny eklersi byen avan ki zot ekspekte. Zis Trust the Process! Detay you want Detay you will get!

Madanm Spiker, vi ki mon ladres ozordi i enn ki annan pour lobzektiv adres bann pwen prensipal ki bann manm sa Lasanble in leve dan zot entervansyon, mon pou reponn lo sa bann size prensipal enn par enn.

### **Kad Saler pou bann Ansenyan**

Madanm Spiker, permet mwan pou donn plis leksplikasyon lo revizyon kad saler pour bann ansenyan k'in ganny mete dan bidze saler Minister Ledikasyon e Devlopman Resours Imen e ki

pou ganny enplimante apartir le premye Zilyet 2026. Revizyon kad saler pou bann ansenyan i konpri lazisteman dan sa bann kategori swivan:

- “Inducement allowance” i pou aplikab pou tou ansennyan, enkli asistan ansenyan.
- “Responsibility Allowance” i pou aplikab pou bann ansenyan ki pran diferan responsabilite dan lekòl, dan lot mo sa I bann “Teacher Coordinator”.

Lo kote revizyon saler pou bann “Headteacher” and “Deputy Head Teacher”, Gouvernman tin deza revwar alawenns e anba kad saler pou sa kategori e ki ti gany finanse an Zanvye 2020.

Madanm Spiker pou klarifye, bann counsellor ki travay dan lekòl, zot ganny ankadre anba en kad saler ki spesifik pou “Counsellor” dan Minister Ledikasyon e Devlopman Resours Imen. Gouvernman, pe deza travay lo en revizyon kad saler pou bann counsellor dan lekòl e ki pou ekspekte ganny enplimante byento.

### **Travayer Korperativ**

Madanm Spiker, Honorab Arrisol in mansyonnen ki napa nanryen pour bann travayer korperativ. Me sa menm Onorab in bliye ki Gouvernman LDS ti ferm korperativ le 31 Desanm 2023. Tou bann housekeeper i en travayer Gouvernman e zot pe ganny menm benefis parey lezot travayer Gouvernman. Mon demann mon lekor si Onorab Arrisol in fou ou si son latet ki pa bon!

### **Bidze pour bann pti proze dan distrik**

Madanm Spiker, Departman pou ‘Poverty Alleviation’ pou osi ganny en bidze SR 9 milyon an 2026. Sa bidze i enkli SR 3 milyon pou konmans program pou asiste bann fanmiy ki pli vilnerab lo kondisyon zot lakaz. En bidze SR 8.5 milyon in osi ganny bidzete anba Gouvernman Lokal pou enplimant bann proze anba skim reparasyon lakaz.

Sa alokasyon ti ganny bidzete an 2025 me sa bann proze ti tonm viktim inefikasite legzekisyon bidzeter gouvernman LDS e i ti parmi sa total 79 proze ki t’in ganny bidzete me selman 4 – mon repete Selman 4 dan 79 – ki ti ganny enplimante par Gouvernman presedan. Sa Madanm Spiker i montre ou ki kalite leker sa Gouvernman ti annan pour son sitwayen.

I osi annan en provizyon adisyonnèl SR 4.2 milyon rounpi anba bann pti proze irzan dan distrik e osi SR 26 milyon anba Gouvernman Lokal pou fer bann proze ki pou ede amelyor kalite lavi bann fanmir dan bann kominote.

### **Benefis saler ki pann ganny byen partaze**

In osi ganny dir dan repons serten manm Lasanble ki zis serten kategori travayer ki'n benefisyè avèk sanzman saler e an partikilye bann Home Carers pan benefisyè.

Madanm Spiker kot i konsèrn home carers rezon ki zot pann ganny menm benefis parey lezot travayer servis piblik i akòz pou le moman home carers pa anploye avèk Gouvernman. Me demars pe ganny fer pou profèsyonnalizm servis Home Carers e sa avà permet zot annan en kad reminerasyon.

Nou dan parti United Seychelles, Madanm Spiker, nou annan leker pou nou home carers. En bann in deza oubliye ou petet zot fer kwar, ki pa tro lontan zot gran sef ti demande si nou pou run nou pei ek Carers ek Cleaners. La ki bannla in met zot deor aprezan zot fer kwar zot enterese ek Carer. Ankor bat latet. Be si LDS i care so much pour carer, e vi ki zot konsider mwan en minis enkonpetan, mon kwar mwa konsider sanz mon karyer e mwa demann zot pou 'les mwan vin zot boy, les mwan vin zot nennenn'!

Madanm Spiker, bann manm LDS dan sa lasanble in koz labous plen lo sa de logmantasyon saler ki zot gouvernman ti fer an 2023 e 2025 par en poursantaz 10% e 7% respektivman. Sa Madanm Spiker i pa en rikord parey zot in oule fer nou e pep Seswlwa kwar. Zis les mwan donn serten fe Madam Spiker ki rapel sa Lasanble ki Gouvernman US in a plizyer repriz pandan bann kourt periyod fer plizyer revi logmantasyon saler. Sa i le swivan :

- Zanvyè 2012: ti annan logmantasyon saler 6%, 4% e 3% depandan lo saler
- Zanvyè 2014: ti annan logmantasyon saler 20%, 15% e 10% depandan lo saler
- Zanvyè 2015: Lentrodiksyon trezyenm mwan lapey pou travayer Gouvernman
- Zanvyè 2016: Lentrodiksyon trezyenm mwan lapey pou travayer sèkter piblik

- Zanvye 2019: en logmantasyon saler 5% par en alawenns, an vi ki Lasanble Nasyonal kontrole par LDS pa ti aprouv logmantasyon dan grid saler avek en lamannman lalwa.
- Zilyet 2019: Lentrodiksyon Long Servis Alawenns

Alors, LDS aret esey bat latet Seselwa. Se United Seychelles sa parti ki'n regilyerman partaz larises nou kwasans ek nou pep. E nou pou fer li ankor. Zis Trust the Process !

### **Leta Finans Piblik an 2025**

Madanm Spiker, monn osi ekout avek bokou lentere ki manyer bann manm parti LDS in dekri ki manyer zot performans ekonomik e sosyal in sitan en gran sikse. Ler mon ekout zot koz lo zot bann zoli sif lo lekonomi pandan zot letan o pouvwar, i kler ki zot kontinyen 'miss the point'. Wi bann manm LDS, pep Seselwa koman en pep ek matirite in ozordi konsyan nesosite pou en lekonomi stab. Me zot in osi anvoy en mesaz tre kler ki si sa bann zoli statistik si pa amelyor zot kalite zot lavi zot pa enterese.

Zot fer mwan mazin en tim ki zwe zoli football, ki kontrol posesyon, ki fer plis shot lo gol, me ki sa bann shot i pas deor ou tap lo poto, e son bann siporter i vir kont sa Manager ek son bann zwer. Se sa kin arive an Septanm e Oktob 2025 Madam Spiker. Par kont, parti United Seychelles i kwar ki menm si ou fotball i pa touzour pli zoli pou gete, me si ou tim i efikas e score goal, se sa ki pli enportan. Ou siporter i pli ere. Pep Seselwa i anvi en 'winning team' e non pa en tim ki zwe zoli football me san lenpak so 'game'. An Septanm e Oktob 2025, zot ti elekte en 'winning team' e met bann loser dan bin.

Ankor an parlan performans, mon ankor enn fwa rapel sa Lasanble ki anba gouvernement LDS rating Sesel enternasyonalm pou egzeksyon bidzeter in tonm 'C' an 2025 lo rating PEFA, kant a anba Gouvernman US ler sa dernyen klasman ti ganny fer nou rating ti 'A'. Ki plis levidans ki sa ki polisi bidzeter gouvernman LDS in en total failure.

## **Det Nasyonal**

Madanm spiker, kestyon det pei I enn kin osi mont bokou dan bann lentervansyon sa semenn, alors permet mwan pou adres sa size.

Premeryman Madanm Spiker, plizyer manm parti LDS inn koz lo poursantaz det par rapor a GDP e zot in plizyer fwa fer referans avek 80 poursan debt-GDP-ratio ler zot ti vin o pouvwar an 2020. Me, sa ki zot pann dir nou se ki logmantasyon dan nivo det pou ariv 80 poursan GDP an 2020 GDP ti rezilta direk lepidemi COVID 19. Onorab Sopha ti osi fer zot rapel sa yer. Lemonn antye ti sibir sa fenomenn eE Sesel pa ti en leksepsyon..

Madanm Spiker i annan e lot fe partikilyerman enteresan konsernan sa kestyon nivo det par rapor a GDP. si nou analiz evolasyon det avan ki lepidemi COVID 19 ti eklate, swivan revizyon en rekalkilasyon, swa an term ekonomik 'rebasing' dan GDP par Biro Statistik an Zen 2023, par Ladministrasyon LDS, nou a obzerve ki nivo det Sesel koman en poursantaz GDP ti sorti 52.5 poursan an 2018 e i ti desann pou ariv 48 poursan alafen 2019, anba gouvrenman Prezidan Danny Faure.

Sa i montre nou ki avan lepidemi COVID 19 ti eklate, Sesel tin fini atenn nou lobzektif lon term pou anmenn en nivo det par rapor a GDP par anba 50 poursan, e ki selman apre larive pandemik COVID 19 ki nivo det ti monte pou ariv 80.2% an 2020. Sa i en fe ki Gouvrenman LDS zanmen in koz lo la tou sa letan, zot in toufe! Zot in plito fer propagann avek sa sif 80 poursan an 2020 sa ti pirman lenpak COVID 19 e ti napa nanryen pou fer avek performans ekonomik Gouvrenman US.

Madanm Spiker en lot keksoz sokan si mon kapab servi sa term, i ki bann manm LDS dan Lasanble in kritik mwan aköz dan mon diskour Bidze mon ti dir ki nou Gouvrenman in angaz li fermeman pou retourn nivo debt a en poursantaz GDP 50 poursan disi lannen 2030. Mon war li sokan aköz sa bann menm manm ti la dan sa menm Lasanble zis enn ti pe plis ki enn an pase ler zot prop Minis Finans mon ansyen koleg Naadir Hassan ti donn son ladres Bidze pou 2025, e dan son ladres i ti dir e mon site *'Nou ekspekte pou fini lannen 2024 avek en stok det lavalaler 61.5 poursan GDP. Nou stok i ankor soutenab, e gard nou lo sa semen, ki nou a kapab realiz nou target pou redwir nou*

*det ver 50 poursan avan 2030*'. Madanm Spiker be ki si sa sa? Si mon ti enn sa bann manm LDS la devan mwan mon ti pou seryezman met mon latet anba latab ek anbarase pou antann sa apre tou sa ki zot in dir lo sa size sa semenn. Madanm Spiker, ankor enn fwa mon demande si zot fou ouswa zot latet ki pa bon !

### **Benefis Retret sekirite sosyal**

Madanm Spiker monn antann bokou diskisyon lo sa size pandan sa trwa zour.

Pandan son kanpany eleksyon, Prezidan Dr. Patrick Herminie ti a plizyer repriz donn son langazman pou fer nivo Sekirite Sosyal ariv 10,000 roupi par mwan pli tar lannen 2029. I ti eksplike ki sa ti pou vin atraver en ogmantasyon anyel ki pou an rezilta en mekanizm Triple Lock, ki monn eksplike dan sa ladres ozordi. Me Prezidan Herminie ti al pli lwen ki sa e i ti decide donn en logmantasyon imedyat 800 roupi a partir Zanvye 2026.

Me menm si ti'n ekri klerman an nwar e blan ki lobzektif Prezidan Herminie ek son Gouvernman pou antreprann en logmantasyon anyel pou ariv 10,000 roupi par mwan disi lannen 2029, imedyateman apre ki i ti pran lofis koman Prezidan, LDS parey sa zannimo blese ti komans en kanpany propagann pou esey fer Seselwa kwar ki Prezidan tin promet pou donn 10,000 roupi tou de swit e ki i pann gard son promes!

Madanm Spiker, ozordi mon pou touy sa mansonz, sa 'myth', enfwa pou tou, ozordi isi dan sa Lasanble, akoz ZANMEN Prezidan Dr Herminie in deza dir okenn par ki pansyon ti pou vin SR10,000 imedyatman ler i vinn o pouvwar.

Madanm Spiker dan mon lanmen I annan Manifesto United Seychelles, e permet mwan pou lir en paragraph konsernan sekirite sosyal. Lo paz 18, anba "**Social and Family Development**", '**Key Initiatives**', mon site: *'introduce a triple lock that will ensure an **annual** increase in social security that will either match the rate of inflation, percentage in-crease in average earnings or 3.5% of the current level, whichever is highest aiming to increase social security to reach SR10,000 per month by the **fourth** year; periodically, Government will consult with the Board of the Pension Fund to review the adequacy of pension levels'* Mon ferm sitasyon. An kreol sa I tradwi konm swivan: *entrodwir en system ki pou lock en logmantasyon anyel dans sekirite sosyal*

*an aplikan to pli eleve e trwa mekanizm posib, swa i pou an linny ek to lenflasyon, swa an linny avek logmantasyon anyel dan nivo saler moyenn, ou senpleman en to 3.5 pousan, avek bi pou ogmant peyman sekirite sosyal pou ariv 10 mil roupi o pli tar **KATRIYENM** lannen; e de tanz-a-ot, Gouvernman pou konsilte Board Fon Pansyon Sesel avek bi pou reviz nivo fon pansyon adekwat.*

Nou pa zis en Gouvernman ki koze me nou pou realiz sa langazman par 2029. Konpar sa avek Gouvernman presedan ki ti donn son langazman bann retrete pou ogmant sekirite sosyal pou ariv SR10,000 pandan son manda, me i ti donn selman en logmantasyon zis 900 roupi; 500 roupi an 2022 e 400 roupi an 2025. Par kont Prezidan Herminie in promet SR 10,000 apre 4 an, e in deza fini donn SR 800 roupi dan son premye 3 mwan. Nou napa okenn dout ki i pou delivre son promes pou sa benefis sekirite sosyal ariv SR 10,000 roupi o pli tar 2029.

Madanm Spiker enn ou de manm lasanble in demande, e mon osi konsyan ki piblik in demande, akoz nou kapab pey sekirite sosyal a laz 63 an me laz pou peyman pansyon in reste 65 an. Sa madanm Spiker i senpleman akoz Sekirite Sosyal I en skim kot larzan i ganny ramase par Gouvernman a traver income tax e i ganny peye koman en depans bidzeter. Kant a larzan dan Fon Pansyon, li i apartyen a bann kontribiter, ki swa dan sekter piblik ou sekter prive. Akoz sa, desizyon kle tel ki laz ki pansyon i ganny peye i en desizyon konzwent ant Gouvernman et bann mann sekter prive lo Board, ki konsider plizyer faktor kle tel ki viabilite finansyer Fon Pansyon avan sanzman nivo ou laz pansyon i ganny sanze.

### **Lavant 22 Poursan Shares Standard Chartered Bank dan Nouvobanq**

An se ki konsern lavant 22 poursan shares Standard Chartered Bank (SCB) dan Nouvobank, sa pe avans byen Madamm Spiker. Ler nou Gouvernman ti vin opouvwar, en dezyenm demars par Trade Development Bank (TDB) pou aste sa 22 poursan shares SCB ti deza an kour e t'in ariv devan labank santral Sesel (CBS) pou donn son laprouvasyon an prensip. Mon dir an prensip akoz dapre Shareholders Agreement ki ti ganny sinnyen ant SCB e Gouvernman Sesel ler Nouvobanq ti ganny kree, enn ant sa de parti pa sipoze kapab vann son shares san ki in ofer sa lot shareholder premye opsyon lo sa bann shares.

Pandan en meeting ant Presidan Herminie, Presidan TDB e mwan menm an Oktob 2025 apre ki I tin fek ganny elekte, Prezidan Herminie ti enform TDB ki Gouvernman pa pou donn son laprouvasyon pou TDB aste sa bann shares e ki I lentansyon nou gouvernman sete pou selman donn son laprouvasyon pou Fon Pansyon Sesel aste sa bann shares.

Swivan sa, dan mon kapasite koman minis finans, mon ti ekrir TDB, SCB e CBS pou enform zot desizyon gouvernman. Apre sa an Novanm 2025, SPF ti antre an kontak avek SCB e la demars ti konmansé.

An term kote nou ete ozordi, en lagreman ki anmenn 4 antite ansanm pe ganny finalize e pou byento ganny sinnyen. Sa kat parti i Gouvernman Sesel, SPF, SCB e Nouvobanq. Sa lagreman i neser pou asire ki tou bann provizyon dan lagreman orizinal ant bann shareholders (SPF/GOS/Nouvobanq) i ganny respekte. Sa lagreman ant sa kat parti pou asire ki sa bann langazman swivan i ganny respekte:

- Gouvernman i donn permisyon Standard Chartered pou vann son 22% ek SPF;
- Standard Chartered i ganny lotorizasyon son Board pou vann son bann shares ek SPF;
- Nouvobanq i enform Labank Santral Sesel lo sa lavant, an liny avek Financial Institutions Act;
- Standard Chartered, Governman e Nouvobanq i donn laprouvasyon pou antreprann en due diligence konplet lo Nouvobanq;
- Nouvobanq i furni tou lenformasyon e I donn son ko-operasyon total pandan prose due diligence;
- Pri lavant pou depan lo okenn aspe ki ganny devwale pandan prose due diligence;
- “Correspondent banking relationship” i ganny retenir pou en peryod 5 an apre ki sa lavant e transfer bann shares I ganny konplete
- Labank Santral i formelman enform e aprouv lavant ek SPF.

SPF pe osi drafte lagreman lavant e lakizisyon ki pou spesifye en pri lavant previzwar prenan kont due diligence, apre ki le de dokiman ava ganny sinnyen. SPF in osi preski konplet prosedir pou

apwont en konsiltan enternasyonal endepandan atraver en prosesis konpetitiv ki pou antreprann evaliasyon due diligence. I ekspekte ki apwontman sa konsiltan endepandan ava byento ganny finalize. SPF pe osi ekspekte annan en miting avek Standard Chartered an person pou negosye pri final sa tranzaksyon e relasyon correspondent banking, ensi ki tou lezot size ki konsern relasyon correspondent banking ant Nouvobanq e SCB.

A mwen ki I annan bann sitiasyon ki pann ganny prevwar, nou ekspekte ki sa prosesis pou kontinyen al tre byen e SPF pe konstaman update Standard Chartered lo tou devlopman.

### **Laliny Kredi avek Gouvernman Lenn**

Madanm Spiker, laliny kredi ki Gouvernman Lenn in fek komit pour Sesel i en lot size kin ganny bokou diskite pandan sa trwa zour. Monn antann en bann spekilasyon sorti ankor kot manm LDS sirtou konsernan bann term e kondisyon sa laliny kredi.

Me parey Onorab Aglae in byen esplike, zeneralman ler en package finansyel i ganny agree ant de leta, i tre rar ki an menm tan bann term e kondisyon egzakt sa package I ganny defini imedyatman. Zis parey tou lezot loan bilateral e menm multilateral parey World Bank, se pli tar ki sa bann term e kondisyon i ganny negosye e agree. Sepandan Madanm Speaker, term e kondisyon loan i zeneralman standar pou sak pei e lenstitisyon me an menm tan sa bann term e kondisyon i varye depandan lo sak pei e lenstitisyon. Alor ozordi mon pa dan en pozisyon pou donn detay term e kondisyon sa \$125 milyon aköz nou pa ankor finaliz sa bann negosiasyon.

Me mon ti a kontan fer resorti Madanm Spiker ki i pa fer premye fwa ki Gouvernman Sesel i pran en laliny kredi avek Gouvernman Endyen. Pandan lannen 2020 a 2025, pandan ki Gouvernman LDS ti lo pouvwar, en sonm US\$ 5.3 milyon in ganny prete ek Sesel par Lenn anba ‘Indian LOC’ pou proze ‘Health Information System’ e bann nouvo bis SPTC.

Bann kondisyon anba sa LOC kin ganny pran i pou en lentere 1.75 poursan, 5 an gras e repeyman pour en peryod 20 an. Alors mon demann bann manm LDS dan sa lasanble pou aret ipokrit e aret fer krwar ki premye fwa en LOC pe al ganny pran par en Gouvernman. Ki manyer en group dimoun i kapab kontradir zot lekor koumsa Madanm Spiker. Ankor enn fwa mon bezwen demande si zot fou ou swa si latet ki pa bon!.

## **Assomption**

Madanm Spiker mon pou adres de pwen lo sa size zil Assomption. Premyerman lo sa size vann ou pa vann Assomption. Lo sa size mon pou donn ban fe ki pou montre ki se Gouvernman LDS k'in pratikman vann Assomption.

Dan sa lagreman ki gouvernman LDS ti sinnyen avek bann devloper proze lotel lo zil Assomption, sa gouvernman ti aksepte en to 2 dolar Ameriken par met kare. Par kont Madanm Speaker, zis 2000 kilomet les avek Assomption gouvernman Morisyen pe sarz Gouvernman Angle 3.74 liv sterlen—ouswa 5.10 dolar Ameriken—par met kare pou lease premye 27 kilomet kare zil Diego Garcia. Sa i vedir ki Sesel in sarz zis 40 pousan sa ki Moris pe gannyan avek Gouvernman Angle pour Diego Garcia. Madanm Spiker an term finansyel sa i ekivalan LDS donn 60 zil Asonmpsyon pou nanryen. Parey zot menm zot in dir. Figures don't lie!

Dezyenman Madanm Spiker, konsernan sa size baz gard lakot lo zil Assomption. Ankor in annan en ta koze, en ta rabase, en ta spekilasyon konsernan sa fasilite militer lo Assomption, pa zis isi dan sa lasanble me menm lo medya sosyal, e dan serten ka par bann obzervater ki serten mon annan gran respe, me ki malerezman pe les zot ganny enflianse par spekilasyon ki napa okenn baz. Mon kapab koz pour plizyer erdtan lo sa size Madanm Spiker, mon mon pou set the record straight dan zis detrwa parol.

Madanm Spiker, parey Prezidan Herminie in dir e mon repete: nou Gouvernman pa pe al fer en baz militer lo Assomption. Nou pou fer en post pou nou coast gard. Mon envit manm sa lasanble e manm piblik ki enterese pou al lir lo internet e zot a konpran diferans ant en baz militer en en post naval coast guard.

Dezyenman, sa post naval pou konstrir PAR gouvernman Sesel, POU Coast Guard Sesel. Me parey Prezidan Herminie in dir, nou pou welcome coast guard okenn nou pei zanmi pou servi sa fasilite lo bann kondisyon ki ava ganny etabli avek nou Coast Guard. Byensir okenn pei zanmi ki pou pare pou ofer lasistans et sa Coast guard ava byenveni pou fer li, ankor lo bann kondisyon ki ava ganny agree.

Me Madanm Spiker napa okenn kestyon, okenn dout ki sa pa pou en baz naval okenn e a okenn moman nou souvrennte pa pou ganny konpromet akoz sa pou touzour en fasilite Gouvernman e Coast guard Sesel. Mon asir sa Lasanble, ki pandan vizit Prezidan Herminie dan Lenn, a okenn moman pandan sa 2 miting, 1 konferans lapres e 1 dezennen ant Prezidan Herminie et Premye Minis Modi, okenn kondisyon pann zanmen ganny diskite pou ki Lenn i asiste Sesel avek sa baz Coast Guard an retour pou okenn kondisyon ki afekte nou souverente.

Annou osi pa oublie Madanm Spiker, parey Onorab Aglae ti rapel nou yer, Gouvernman LDS ti osi totalman an faver sa post Coast Guard, konfirman par ex-VP Afif isi menm dan sa Lasanble. Me ki nou vwar ankor, lipokrizi LDS. Parey plizyer manm United Seychelles in rapel zot, sanmenm sa rezon ki zot kot zot ete ozordi!

### **Bidze Biro First Lady**

Madanm Spiker, pandan sa de dernyen zour bokou koze e politik bon marse inn ganny fer lo sa logmantasyon dan bidze lofis ‘First lady’. Anba ladministrasyon aktyel, Biro “First lady” i pa en pozisyon seremonyal, in ganny etabli konman en biro totalman endepandan. First Lady i annan son vizyon, e en plan d’aksyon ki vreman sarze.

Madanm Spiker ankor bann manm LDS dan sa lasanble in anbaras zot lekor akoz zot in sot an gran san byen fer zot homework, ler zot in war en sif 7 milyon rroupi anba bidze lofis ‘First Lady’ an kwayan zot in ganny aminisyon pou atak sa madanm e sa bidze. Be zot aminisyon in pet avek zot apre ki serten manm kot United Seychelles (Onorab Louise e Onorab Vidot), e la mwanmenm, mon pou klarifye detay bidze biro ‘first lady’. Sa I konm swivan:

- SR 4 milyon ladan i senpleman reprezant transfer bidze “Paradis des enfants” ki oparavan ti anba kategori sibvansyon.
- SR 1.2 milyon pour rekritman 5 travayer ki pou siport sa biro
- SR 1 milyon pou louvraz renovasyon lo family house, anvi leta e kondisyon sa batiman in’n neser pou nou fer en renovasyon pou fer sir I dan en kondisyon agreab.
- SR 983 mil selman pour kouver depans relye avek loperasyon sa lofis ki en biro a plen tan.

Madanm Spiker, mon rol koman minis finans se zer finans pei. Me mon pa kapab pa dir en mo konsernan First Lady Madanm Veronique Herminie. Vreman ki problem LDS ek sa madanm? Parti US, ki son lidèship, ou son bann sipòter in toultan annan zis respe pou ansyen First Lady Ramkalawan. Ki zot problemm avek First Lady Veronique Herminie? Son Fondasyon i fatig LDS, son sak in vin en problemm pou zot.

Madanm Spiker sa madanm pa bezwen personn pou donn li sa sak ki i mars avek. Si mon permet mon leko pou dir, i pa bezwen ni LDS, ni US, ni menmm son Msye pou donn li en tel sak akòz sa madanm i en profesyonel, en Internationallly Qualified Chartered Accountant ki kapab afford son prop keksoz. Sa madanm i en problemm pou zot akòz i en madanm avek klas, en madanm avek boukou lenerzi, me sirtou i en madanm avek bokou senplisite, imilite e en gran leker, zis parey ex-First Lady Madanm Ramkalawan. Alor parey noun respekte ansyen first lady silvouple respekte pou nou.

### **Pri Lavi e Pri Kontrol**

Madanm Spiker en keksoz ki monn konpran tre kler atraver bann lentervansyon sa semenn i ki bann manm LDS e zot parti i annan en problemm serye avek nou bann zefor e polisi pou adres kestyon pri lavi. I kler ki zot pe ganny kosmar akòz nou pe reisi redwir pri lavi ler zot in 'fail' pou fer li.

Madanm spiker :

- Zot in konplent akòz nou pou kontrol pri serten komodite de baz
- Zot in konplent akòz nou pou fer pri telekominikasyon desann avek larive Starlink
- Zot in konplent akòz noun komans fer pri bis desann

Be ki zot oule alor, ki Seselwa I kontinyen soufer? Si sa ki LDS i oule, nou dan US nou pou kontinyen rod fason pou soulaz Seselwa lo sa kestyon pri lavi. Sanmenm ki ozordi Seselwa in met zot dan bin. Kontinyen koumsanmen e an 2030 zot pou al rann lapel dan landfill.

Mon repete Madanm Spiker, parti United Seychelles otan ki nou kwar dan sistenm marse lib, nou osi kwar ki ler sistenm marse I 'fail' (*market failure dan terminoloji ekonomik*) Gouvernman i ekspekte antre pou koriz sa 'failure'. Sesel nou en pti pei e lanvironnman konpetisyon Sesel i pa pou toultan parey dan bann gran pei kot konpetisyon i rennyen. Souvan par deryer bann gran distribiter i preski menm dimoun ki pe kontrol sa marse. I normal pou en biznes agrandi e devlope me i pa normal letan biznes i fer bann profi ki egzorbitan lo lasyer nou frer e nou ser seselwa ki pe trimouse pou fer de bout zwenn. Se pou sa rezon ki nou Gouvernman in konsider li nesaser pou re-entrodwir pri kontrol lo enn pti nonm komodite esansyel. Sa ava fer li pli abordab pou en fanmiy mwen fortinen pou met manze lo lasyet son zanf an toulezour.

Pou kominote 'wholesale e retail' Sesel mon lans en lapel pou pa tonm dan pyez sa bann manm LDS ki pe fer zot kwar ki nou pou al afekte zot biznes, ki zot biznes pou fermen. I fer mwan lapenn degre zot dezespere sa bann dimoun. Byento mon pou zwenn ek kominote 'wholesale e retail' pa pou diskit zis sa kestyon me plizyer lezot size ki konsern zot biznes. Monn deza prouve ki mon pare pou ekout sa group biznes. Zot ava rapel ki zis detrwa zour apre ki mon ti rankontre lasosyasyon retailers Sesel ler mon tinn fek pran lofis, mon ti reazi lo zot demann pou fer labank Santral re-entrodwir cheques. Kont lo mwan pou kontinyen travay etrwatman ek zot.

Onorab Savy (LDS) in koz lo STC e in fer serten obzervasyon lo lenportasyon STC, ki STC ti enport zouzou pou Nwel, ki zouzou Nwel ki ti ariv an Fevriye, e en nonm lobzervasyon lo kalite 'perishables' ki STC in vann dernyerman. Me Onorab Savy, mon bon zanmi, me pa Gouvernman LDS ki ti apwent sa Board e Management ki ti enport sa ta zouzou, e pa zot menm ki ti manage zot supply chain? E ankor pa sa menm Board ek Management ki Gouvernman LDS ti apwente k'in konstri 'cold store' k'in vin enn bann pli gran kosmar dan listwar STC? En Cold Store k'in kout taxpayers plis ki 30 milyon rroupi an plis ki tin bidzete? An efe en lodit par Oditer Zeneral lo STC in preski terminen e monn fini antisipe ki sa bann konklizyon pou zis plis kosmar.

### **Lakor Lapes ek Linyon Eropeen**

Protocol lakor lapas avek Linyon Eropeen pou ekspire le 23 Fevriye 2026. In annan 4 seri negosiasyon depi ler negosiasyon in komanse tar lannen pase e ziska ozordi Sesel e Linyon Eropeen pann arive tonm lo en lagreman. Pwen blokaz i lo montan Access fee ki Linyon Eropeen

in ofer ki reste lwen avek lekspektasyon lo kote Sesel. Sesel i reste ouver e pare pou negosye e tonm dakor lo en nivo ki pou reprezant en sitiasyon ki pou anmenn benefis pou tou le de kote.

Kot sitiasyon i ete ozordi, si apre le 23 Fevriye napa en lakor, bann bato Linyon Eropeen ki anrezistre anba paviyon Sesel pa pou ganny drwa lapas dan delo teritoryal Sesel. Zot pou zis kapab servi Por Victoria pou debark e transport pwason ki zot lapas dan delo enternasyonal. Zot pou osi kapab benefisyé bann lezot servis ki bann diferan konpanyen I ofer dan Por Victoria.

### **Travayer Etranze pou kontribye anver Fon Pansyon**

Madanm Spiker, manm lasanble LDS, parey tou lezot keksoz, zot in rabas en ban rabase lo sa size travayer etranze pou kontribye dan fon pansyon san menm annan bann fe e tou lenformasyon lo sa linisyativ. Tou sa bann zafer ki sa pou anmenn logmantasyon dan pri konstrikasyon i zis en bann stupidite pou fer per Seselwa.

Madanm Spiker vi ki sa kontribisyon pou ganny dedwir lo saler sa bann travayer parey i le ka avek tou travayer Seselwa, alors pou napa nesosite pou azistre saler ki anlwayer pou peye. I ava annan en logmantasyon dan kou konstrikasyon si bann anlwayer pou osi bezwen pey en kontribisyon. Pou evit sa, Gouvernman pou diskite en formil avek Fon Pansyon ki pou swa minimiz kontribisyon anlwayer e si posib, pa enpoz okenn kontribisyon lo anlwayer. Sa ava ganny osi diskite avek bann konpanyen konstrikasyon pou asire ki zot osi zot annan en ‘input’ dan sa prosesis.

Lo kestyon si sa bann travayer etranze pou kapab tous zot pansyon apre ki zot kit pei, larepons i byensir ; zis parey tou travayer Seselwa ki kontribye dan okenn fon pansyon ler zot a letranze zot ganny zot pansyon ler zot retourn Sesel.

Madanm Spiker, an term preparasyon Fon Pansyon Sesel (SPF) pou sa linisyativ, SPF in resevwar lasistans International Labour Organization (ILO), atraver en seri lesanz ant sa lorganizasyon e Minister Lanplwa depi 2023 ziska prezan. SPF ti demann lasistans teknik avek ILO lo sa size, anvi bann konplikasyon pou met an plas en tel skim. ILO in fasilite plizyer langazman avek Southern Africa Migration Management ek bann lotorite Swis. An plis, ILO ti sponsor en formasyon sertifikasyon virtyel kot SPF ti benefisyé, atraver partisipasyon 1 manm staff. Lezot ‘peer to peer

review' ti osi ganny fer avek skim pansyon Grenada, atraver lasistans Labank Mondyal an 2025. An Oktob 2025, en vizit lesanz ti osi ganny fer Cape Verde pou benchmark zot sistenm.

SPF in osi demann lasistans Fon Pansyon Moris pou vwar si i posib fer en 'benchmarking' baze lo zot model. En lekip SPF pou fer en lot 'benchmarking' visit an Barbados ver lafen Fevriye 2026. SPF i ekspekte konklir sa proze ver la fen Avril 2026, kot answit en propozisyon final pou ganny soumet devan SPF Board e devan Gouvernman.

### **Loan donnen anba Fon SBFA**

Madanm Spiker, Gouvernman pe travay etrwatman avek Labank Devlopman (DBS) pour finaliz lalis bann loan ki ti ganny donnen anba Small Business Finance Agency (SBFA) k'in ariv lo peryod preskripsyon dapre lalwa. Parey Lasanble i okouran, an 2019 DBS ti ganny sa responsabilite pour zer portfolyo SBFA e depi sa letan i'n pran tou mezir neserer pour rekiper bann loan ki dimoun i drwa dan sa Fon. Me selman, dapre lartik 2271 dan Kod Sivil Sesel, tou drwa pour pran aksyon legal i tonm dan preskripsyon apre en peryod senk an, sof si lartik 2262 i dir keksoz diferan. Alors DBS, pe fer en revi konplet pour asire ki okenn desizyon k'in ganny pran i anliny avek kad legal ki egziste, pandan ki nou kontinyen protez larzan piblik. Alors Madanm Spiker, lekel loan ki pou ganny write off ou pa pou ganny write off napa nanryen pou fer ek ki ou ete e ki parti ou siporte. Sa lalis i ganny determinen par kad legal ki Lasanble Nasyonal ti aprouve e non pa ni Minis Finans, ni DBS koman en lensitasyon

### **Nouvo Lopital Sesel**

Madanm Spiker, kekyon in ganny demande lo nouvo lopital, enkli oli sa depans sa lopital dan bidze 2026 menm si deklarasyon in ganny fer par Prezidan dan diskour Leta Lanasyon e osi bann langazman finansyel apre vizit Gouvernman dan Lenn. Mon anvi fer resorti diferans ant nou Gouvernman konpare ek Gouvernman LDS ler zot ti lo pouvwar. Nou pa ankor pran konsiderasyon sa proze dan Bidze 2026 anvi ki travay preparatwar enkli planifikasyon, evalyasyon teknik, e finalizasyon bann detay kle sa proze i ankor pe kontinyen e ekspekte finalize ver Zen 2026. Alors ler nou a finaliz sa bann proses nou ava met li dan Bidze. Vi ki nou ekspekte sa proze pou ganny finanse par en don, nou osi pa ekspekte okennpa lo balans fiskal primer.

Madanm Spiker, letan ansyen Minis Finans ti prezant bidze 2025, proze nouvo lopital ti ganny enkli pou en sonm SR 87 milyon pour lannen 2025 menm si ti napa en plan. Le 4 Mars 2025, ansyen Prezidan ti zwenn ek komite teknik pou konstriksyon nouvo lopital e dapre lanons lo 'website Statehouse', Gouvernman ti pou annan en plan lo sa proze enkli finansman en Septanm 2025, e osi 'ground breaking' pour konstriksyon, ti sipoze an Novanm 2025. Madanm Spiker, nouvo Gouvernman pan zanmen war en plan ki tin sipoze finalize. Sepandan ti annan en letid fezabilite ki tin konplete. Alors Madanm Spiker, sa i montre diferans ant sa Gouvernman ki lepep seselwa in met li dan bin konpare ek nouvo Gouvernman kin ganny elekte. Nou en Gouvernman ki serye e nou enplimant proze ki nou met dan bidze.

Madam Spiker ankor bann manm sa Lasanble sorti dan parti LDS in esey ridikil nou sikse swivan state visit Prezidan Herminie an Lenn, sirtou apre ki Lenn in kofirmen ki an plis ki sa package finansyel \$175 milyon, i pou osi siport Sesel dan demars nouvo lopital.

Me annou get en pe pli pros ki stratezi gouvernman LDS ti annan pou rod finansman pou son lopital, ki zot ti estimen pou kout 1 bilyon rounpi. Be Madam Spiker ler nou konstate ki sa gouvernman ti kapab kolekte zis 7 milyon rounpi par an, ti pou pran zot 142 zan pou zot kapab arive annan tou finansman pou sa lopital. Malerezman nou tou lo sa later Sesel ozordi ti poun fini mor avan premye blok ti poun ganny mete pou sa lopital ! Be pa zis en fars tou sala! Konmdi bann Onorab US, sanmenm kot zot été ozordi.

### **Logmantasyon dan problemn drog**

Serten bann onorab in koz lo problemn drog ki'n ogmante dan pei. Madanm Spiker, mon le repet ankor ki I reste en priyorite nasyonal pou sa Governman adres problemn drog dan pei. E se pour sa rezon ki Lazans Prevansyon Labi Drog e Reabilitasyon (APDAR) in ganny re-entrodwir konman en lazans endepandan e en alokasyon SR 42 milyon in ganny bidzete anba sa lazans pour bann diferan program ki enkli prevansyon , ledikasyon, reabilitasyon ensi byen ki tretman .

Provizyon bidze in osi ganny fer anba bann proze ek programm bann lezot antite Gouvernman ki pou ede dan prevansyon labi drog e bann loperasyon pou anpes drog ganny trafike dan pei. Sa I enkli en sonm SR 51 milyon k'in ganny bidzete anba lafors lapolis pou programm ki responsab "drug enforcement operations".

### **Kestyon lo Asset Reality**

Madanm Spiker, kestyon konsernan sa lagreman ki annan avek Asset Reality Limited. Younit Lenvestigasyon Krim Finansyel (FCIU) anba lapolis ti premyerman antre dan en laranzman avek Asset Reality an 2022 pou siport zesyon e realizasyon bann byen sezi. An 2023, Minister Finans ti angaz avek sa lakonpanyen lo en baz konsiltan pou asiste avek letablisman 'Asset Management Unit', enkli devlopman son bann Prosedir Standar loperasyon e ranforsman kapasite. 'Asset Reality' in osi donn sipor teknik bann lazans tel ki FIU, ACCS e FSA dan bann size ki annan pou fer avek bann byen vertyel. En evalyasyon pe ganny fer lo okenn laranzman ouswa kontra ki bezwen arive avek 'Asset Reality'. Nou pa pe senpleman kontinyen avek bann laranzman leparse; nou pe ranforsi governans otour zot pou asir latransparans, rann kont, e valer pou larzan pou lepep Seselwa.

### **LAPE, MENAS E ZENOFABI**

Madanm Spiker, parey monn dir lo komansman mon Ladres ozordi, monn apresye kalite bann deba e analiz sa bidze par la mazorite manm dan sa Lasanble. Parmi bann keksoz ki monn osi apresye i bann laspe spirityel ki Onorab Sopha e Onorab Labonte in entegre dan zot lentervansyon... menm si Onorab Labonte in sizere ki mon call Minis Hassan pou pran en pe leson dan lekonomi !! Onorab Labonte, Minis Hassan in enn parmi plizyer mon bann marnmay kin pas dan lanmen ler mon ti Gouverner Labank Santral, zis parey Gouverner Aktyel, CEO Nouvobanq e plizyer ankor ki dan bann fonksyon o nivo ozordi!

Pou retourn lo pwen ki mon anv'i fer lo size lape, menas e zenofobi, Madanm Spiker serten entervansyon ki monn antann in les mwan tre konsernen. Mon konsernen par bann eleman rasism e zenofobik sirtou par Onorab Naidoo ki limenm in osi demann siporter pou al fer protestasyon

piblik si zot pa dakor avek serten langazman e komitman ki nou Gouvernman i fer ou ki i annan lentansyon pou fer.

Madanm Spiker mon dir Onorab Naidoo fer atansyon, bann tel lapel I danzere. Nou en pep ki apresye sa lape ki rennyen dan nou pei ozordi. Mon lans en lapel avek bann Manm Lasanble pou 'lead' by example. Annou promouvwar lape e non pa laenn, rasism e zenofobi. Annou pa target group dimoun par zot ras ou zot lorizin. Annou mazinnen ki nou tou Seselwa, nou desandan swa kolon swa lesklav, swa komersan ki ti vini apre. Me nou annan en sel keksoz an komen, e sa se ki nou tou nou seselwa.

Si zot le proteste, proteste dan bwat vote an 2030, e non pa lo nou semen pou anmenn dezord dan nou pei. Protestasyon e dezord pou anmenn lenteripsyon e retar progre ekonomik e finalman se nou pep ki pou soufer.

### **Konklizyon**

Madanm Spiker nou'n ekout byen deba dan sa Lasanble sa semenn, e menm si perspektiv i kapab diferan, bann fe i reste kler: sa Gouvernman i angaze pou sofgard stabilite makroekonomik tout an asiran ki benefis krwasans i ganny resanti par tou Seselwa e non pa zis serten. Nou kad fiskal i protez stabilite nou lekonomi, i ranforsi konfyans bann lenvestiser, e i kree lespas nesese pou finans bann domenn priyoriter tel ki lozman, lasante, lankourazman lazenes, lekonomi Nimerik e proteksyon sosyal targete. Sa i pa en bidze promes, i en bidze soutenir par disiplin, realizm e en stratezi kler pou progre soutenab.

Nou determinen ki resours piblik i bezwen tradwir dan en amelyorasyon servis, lenplimantasyon bann proze kapital efektiv, e en meyer klima biznes ki donn pouvwar bann antreprenner e kree plis lanplwa. Sa i a ganny fer par amelyor lefikasite, ranforsi gouvrenans, e deblok bann nouvo sekter, pou nou met fondasyon pou loportinite, e ler loportinite i agrandi, bann fanmiy i a santi sa diferans. Se koumsa ki nou sorti dan stabilite pou al dan prosperite partaze, e sorti dan okenn defi pou batir en Sesel pli rezilyan e enklisif.

Alors Madanm Spiker, mon demann sipor tou manm onorab pour sa bidze 2026.

Mersi.